



STEVEN SIM: MINGGU LATIHAN KEBANGSAAN DIBUKA KEPADA SEMUA WARGA ASEAN BUAT PERTAMA KALI

KUALA LUMPUR, 27 Mei 2025 – Malaysia akan membuka inisiatif pembangunan kemahiran utamanya – Minggu Latihan Kebangsaan (NTW) – kepada semua warga ASEAN, menawarkan akses percuma kepada lebih 65,000 kursus di seluruh negara secara fizikal dan dalam talian dari 14 hingga 21 Jun 2025. Pengumuman oleh Menteri Sumber Manusia Malaysia, YB Steven Sim Chee Keong, dibuat bersempena dengan Kepengerusian ASEAN-Malaysia 2025.

NTW merupakan inisiatif utama Malaysia di bawah payung Tahun Kemahiran ASEAN (AYOS) 2025 dan dijangka menjadi program latihan terbesar dan paling inklusif di rantau ini setakat ini. Lebih 65,000 kursus percuma akan ditawarkan di seluruh negara dan secara dalam talian, merangkumi bidang pertumbuhan utama seperti kecerdasan buatan, transformasi digital, teknologi hijau, kepimpinan dan kemahiran insaniah. Program ini akan menampilkan kerjasama dengan platform dan institusi global terkemuka termasuk Microsoft, Udemy, Awantec, Alibaba Cloud serta penyedia latihan terbaik tempatan.

NTW mendapat sokongan utama dari Human Resource Development Corporation (HRD Corp), sebuah agensi di bawah Kementerian Sumber Manusia (KESUMA). NTW merupakan platform berpusat dan berintegritas untuk mencari dan menyertai program pembangunan kemahiran yang ditawarkan oleh Kerajaan Malaysia.

Berucap di Simposium Pelaburan Pembangunan Modal Insan ASEAN (AHCDIS) yang berlangsung di Kuala Lumpur hari ini, YB Steven Sim menekankan kepentingan kerjasama serantau dalam pembangunan kemahiran dan menegaskan komitmen Malaysia untuk melabur dalam masa depan bersama ASEAN.

UNTUK SIARAN SEGERA

“Buat pertama kalinya, kita akan meluaskan peluang latihan berkualiti tinggi ini melangkaui sempadan negara kepada rakan-rakan kita di seluruh ASEAN. Ini adalah pelaburan Malaysia dalam ASEAN, dan pelaburan untuk pembangunan modal insan. Aspirasi kita adalah untuk menjadikan ASEAN sebagai rantau paling berkemahiran di dunia melalui kerjasama yang lebih mendalam dan bermakna bersama negara-negara anggota,” kata YB Steven Sim.

NTW 2025 dijangka menarik sekurang-kurangnya 5 juta peserta dari seluruh rantau ini, dengan nilai latihan dianggarkan melebihi USD600 juta (sekitar RM2.5 bilion). Capaian berskala besar ini mencerminkan keyakinan Malaysia bahawa pembangunan kemahiran bukan sekadar keutamaan nasional, tetapi satu keperluan serantau.

NTW turut mengukuhkan kedudukan Malaysia sebagai peneraju serantau dalam pembelajaran dan pembangunan, serta menjadi penanda aras baharu dalam kalangan negara ASEAN. Ia turut melengkapi acara utama AYOS yang lain termasuk Persidangan Pasaran Latihan ASEAN pada bulan Julai, Persidangan TVET ASEAN pada bulan Ogos dan Forum Kemahiran Global yang akan dijalankan serentak dengan Forum Menteri Tenaga Manusia ASEAN untuk Pembangunan Modal Insan pada Oktober.

Malaysia mengalu-alukan penyertaan semua warga ASEAN untuk mengambil peluang luar biasa ini dalam meningkatkan kemahiran, memperluas pengetahuan dan bersama-sama membina tenaga kerja ASEAN yang bersedia menghadapi masa depan.

YB Steven Sim turut menekankan bahawa kejayaan jangka panjang ASEAN bergantung kepada keupayaannya untuk bergerak melangkaui model ekonomi tradisional dan merangkul industri masa depan yang berteraskan digital, hijau dan berimpak tinggi.

“Sudah tiba masanya ASEAN tidak hanya menjadi hab pembuatan kos rendah semata-mata. Kita mesti menjadi pusat inovasi global – dipacu oleh bakat berkemahiran, kerjasama yang teguh dan matlamat yang dikongsi bersama,” ujarnya.

AYOS turut mendapat sokongan padu daripada kepimpinan serantau. Setiausaha Agung ASEAN, Dr. Kao Kim Hourn, memuji kepimpinan Malaysia dalam memperkasa agenda peningkatan kemahiran di peringkat serantau:

UNTUK SIARAN SEGERA

“Saya merakamkan penghargaan tulus kepada Kementerian Sumber Manusia dan HRD Corp atas kepimpinan visi mereka dalam melancarkan Tahun Kemahiran ASEAN 2025 sebagai inisiatif utama sempena Kepengerusian ASEAN-Malaysia 2025. Simposium ini menyediakan platform yang amat tepat pada masanya untuk kita memperkukuh komitmen bersama dalam melabur kepada rakyat kita – arkitek sebenar pertumbuhan ASEAN dan asas kepada ketahanan serta kemajuan serantau,” kata beliau.

Menyokong inisiatif ini, **Pengarah Pasukan Sokongan Teknikal Kerja yang Layak untuk Asia Timur dan Asia Tenggara serta Pasifik merangkap Pengarah Negara untuk Thailand, Kemboja dan Lao PDR dari Pertubuhan Buruh Antarabangsa (ILO), Cik Xiaoyan Qian** berkata dalam ucapannya:

“Pembangunan kemahiran tidak boleh berlaku secara terasing. Untuk benar-benar memperkasa pekerja dan menyokong pertumbuhan ekonomi inklusif, pelaburan dalam kemahiran tenaga kerja mesti disepadukan dalam kerangka pembangunan pekerjaan dan ekonomi yang lebih luas. Keselarasan dasar seperti ini penting untuk menyediakan tenaga kerja ASEAN bagi menghadapi dunia pekerjaan yang sentiasa berubah,” katanya.

Dianjurkan oleh KESUMA melalui HRD Corp, Simposium AHCDIS yang berlangsung selama dua hari ini membawa tema ‘Pelaburan dalam Modal Insan, Pembiayaan Mampan, Perkongsian Awam-Swasta dan Keterangkuman Sosial’, menyaksikan penyertaan lebih 300 peserta dari seluruh ASEAN.

Pengerusi HRD Corp, Datuk Abu Huraira Abu Yazid, turut menegaskan kepentingan AHCDIS kepada rantau ini dalam ucapannya:

“Simposium ini merupakan sebuah platform tindakan serantau yang menghimpunkan pembuat dasar, pertubuhan majikan, wakil pekerja, rakan pembangunan dan institusi pendidikan untuk bersama-sama mengenal pasti penyelesaian yang boleh dilaksanakan, berkongsi amalan terbaik dan membina momentum ke arah pelaburan jangka panjang dalam modal insan.”

Hasil daripada simposium ini akan menjadi platform penting untuk kerjasama dan perkongsian ilmu, serta dijangka menyumbang secara signifikan dalam merangka dasar dan pelaburan masa hadapan bagi pembangunan modal insan di rantau ini, seterusnya memacu pertumbuhan ekonomi yang mampan dan kemajuan sosial dalam kalangan negara-negara ASEAN.

UNTUK SIARAN SEGERA

Antara tetamu kehormat yang hadir termasuk Timbalan Ketua Setiausaha (Dasar dan Antarabangsa), KESUMA, Dr. Mohd Shaharin Umar; Timbalan Ketua Setiausaha (Operasi), KESUMA, Sutekno Ahmad Belon; Ketua Pegawai Strategi HRD Corp merangkap Pengerusi Penganjur AYOS 2025, Dr. Rony Ambrose Gobilee; Penasihat AYOS 2025, Datuk Wira Shahul Dawood; serta Penolong Pengarah dan Ketua Bahagian Perburuhan dan Perkhidmatan Awam di Sekretariat ASEAN (ASEC), Ibu Mega Irena.

Ketahui lebih lanjut mengenai **AYOS 2025**, **AHCDIS** dan semua platform utama lain di bawah AYOS 2025 melalui portal rasminya di <https://aseanyearofskills.org/>, dan akses butiran penuh mengenai **NTW** di <https://www.nationaltrainingweek.gov.my/>.

-Tamat-

UNTUK SIARAN SEGERA

About Human Resource Development Corporation (HRD Corp):

Human Resource Development Corporation (HRD Corp), dahulunya dikenali sebagai Majlis Pembangunan Sumber Manusia (MPSM), telah ditubuhkan pada tahun 1993 dan kemudiannya diperbadankan sebagai Pembangunan Sumber Manusia Berhad (PSMB) melalui penggubalan Akta Pembangunan Sumber Manusia Berhad 2001.

Sebagai sebuah agensi di bawah Kementerian Sumber Manusia (KESUMA), HRD Corp bertanggungjawab terhadap pungutan levi dari industri utama serta pengeluaran geran latihan melalui mekanik dalamannya, Kumpulan Wang Pembangunan Sumber Manusia (KWPSM) atau Human Resources Development Fund (HRDF).

Penjenamaan semula HRD Corp pada 2021 merupakan cerminan tanggungjawab, hala tuju dan misi organisasi yang baharu. Ini termasuklah memperluas usaha peningkatan kemahiran dan kemahiran semula oleh majikan untuk para pekerja ke arah produktiviti yang lebih mapan.

Pembaharuan ini bukan sahaja memberi manfaat kepada setiap individu warga Malaysia, malah turut memperkasakan komuniti yang memerlukan melalui peluang penjana pendapatan yang lebih inklusif.

Transformasi ini sejajar dengan cita-cita HRD Corp untuk memacu aspirasi pengembangan tenaga kerja negara yang berkemahiran tinggi untuk jangka panjang.

Untuk maklumat lanjut, sila layari www.hrdcorp.gov.my.